

小

腆

紀

傳

小腆紀傳卷第三十五

前翰林院檢討加詹事府贊善銜六合徐鼎

列傳第二十八

秦良玉

楊之明補

馬京

弟亭等補

龍在田

祿永命

王克猷

那嵩子燾

龍吉兆

弟吉佐

秦良玉忠州人石柱宣撫使馬千乘之妻萬厯二十七年征播州蠻良玉夫婦功稱最千乘死良玉代領其職爲人饒膽智善騎射兼通詞翰儀度嫺雅每行軍號令嚴肅所部號白梃兵爲遠近所憚泰昌時以援遼功賜三品服兄邦屏授都

司僉書弟民屏守備天啟元年邦屏渡渾河戰死民屏突圍
出良玉自統精卒三千赴之所過秋毫無犯詔加二品服子
封誥子祥麟授指揮使良玉陳邦屏死狀兵部尙書張鶴鳴
亦言渾河血戰寶石砦西陽二土司功贈邦屏蔭子祠祭民
屏進都司僉書奢崇明之亂諸土司皆貪賂賂逗遛獨良玉
破樊龍兵解成都圍克佛圖關復重慶錫夫人誥命授都督僉
事充總兵官祥麟民屏及邦屏子翼明拱明咸進秩良玉益
感奮先後攻克賊巢川賊定復援貴州三年六月言臣率翼
明拱明提兵裹糧累奏紅崖墩諸捷乃行間諸將未睹賊而
攘臂誇張及平對壘風聞先遁敗於賊者惟恐人之勝怯於
賊者惟恐人之強如總兵李維新渡河一戰敗衄歸營反拒

臣不容一見以六尺軀鬚眉男子忌一巾幗婦人亦當愧死
優詔報聞崇禎三年永平四城失守良玉率翼明奉詔勤王
捐貲濟餉帝優詔褒美召見平臺賜良玉綵幣羊酒賦詩旌
其功會四城復命良玉歸而翼明留駐近畿時流賊日熾良
玉自京師還不復遠出惟專力辦蜀賊四破羅汝才之眾奪
其大纛禽其副渠賊勢漸衰而督師楊嗣昌盡驅賊入川巡
撫邵捷春以弱卒二萬守重慶所倚惟良玉及副總兵張令
二軍絳州知州陸遜之過良玉營酒次良玉歎曰邵公不知
兵吾一婦人受國恩應死恨與邵公同死耳遜之問故良玉
曰督師以蜀爲壑無智愚皆知之邵公不以此時爭山奪險
令賊無敢卽我而坐以設防此敗道也旣張令戰死竹箇坪

良玉所部三萬人亦略盡單騎見捷春日事急矣盡發晉溪
峒卒可得二萬我自餽其半官半之猶足辦賊捷春見嗣昌
與己左而倉無見糧謝其計不用良玉乃歎息歸十六年冬
張獻忠盡陷楚地將入蜀良玉圖全蜀形勢上之巡撫陳士
奇請益兵守十三隘士奇不能用復上之巡按劉之勃之勃
許之而無兵可發明年正月賊犯夔州良玉馳援眾寡不敵
潰及全蜀盡陷良玉慷慨語其眾曰吾一婦人受國恩二十
年今不幸至此其敢以餘年事逆賊哉與所部約曰從賊者
族無赦乃分兵守四境賊遍召土司無敢至石砭者後獻忠
死而良玉竟以壽終

楊之明世爲天全六番招討使乙酉三月獻賊至雅州知州

王國臣者初通聞將馬曠繼又歸於獻賊與下川南道胡寅
不睦將執以與賊寅逃入土司高克禮家而之明族姓與高
世讎互讎殺弟之喬又欲因亂殺之明以降賊遂執胡寅並
家口數十人送獻賊殺之之明乃與宗室朱奉鉞舉人鄭延
爵合謀起兵與賊戰於飛仙關兵敗被殺延爵收兵再戰歿
於陣我

朝賜之明通諡烈愍

補

馬京漢將馬岱後也世爲黎州宣慰司初獻賊入蜀以蜀人
易制惟黎雅間土司難於驟服用降人爲招誘鑄金印齎之
京時年十六擲印於地誓不屈僞遊擊苗某赴黎雅任京密
調番眾與弟亭攻之擒僞弁七十餘人斬之演武廳祭旗討

賊令白通使及白寰翠招致富莊頭人姜黃柰李蔡包張七
姓子弟土千戶李華宇亦率眾至京卽以七姓畀之而海棠
堡指揮使丁應選甯越守備楊起泰以道臣胡恆之檄引兵
入援聞恆死遂與京兄弟合得兵萬餘與賊大戰於雅州龍
觀川殺數千人陣擒僞帥方總兵斬之餘賊遁還遂復黎雅
自是不被寇者數年京少年好酒色踰年竟卒亭襲爲千戶
庚寅九月劉文秀至竭力拒守被執不屈死華宇苦戰賊禽
而尚之年八十四矣應選亦以年老歿於陣同時起兵之七
姓子弟頭人俱戰死無一降者

補

龍在田石屏土官舍人也天啟二年與阿迷普名聲武定吾
必奎平滇賊安效良等由土守備擢坐營都司崇禎八年應

詔擊楚豫流寇有功擢副總兵十年三月禽大盜郭三海十一年九月破賀一龍李萬慶於雙溝進都督同知明年三月破賊固始斬首三千五百有奇張獻忠之叛也熊文燦命在田駐穀城防賊東突中讒罷歸行至貴州擊平叛賊安隴壁十五年夏中原盜益熾疏言臣捐貲募精卒九千五百戰象四戰馬二千五載捷二十有八忌口中阻自臣罷歸親藩辱名城陷蓋諸將所統多烏合遇寇卽逃乏餉卽譟滇兵萬里長驅家人父子同志非若他軍易潰也一歲中秋冬氣涼賊得馳騁春夏則入山養銳夫平原戰旣不勝山蹊又莫敢攖蕩平何日滇卒輕走遠跳善搜山臣願整眾掃寇望速給行糧下部議竟不行乙酉八月吾必奎叛在田與甯州土知州

祿永命討禽之未幾沙定洲據雲南迤東諸郡盡陷在田與土官許名臣走大理遣使告急於孫可望定洲破滅而可望遂不可制後在田死於難

祿永命甯州土知州也崇禎中從總理熊文燦討流賊有功乙酉秋八月元謀土知州吾必奎反永命偕石屏龍在田討禽之十二月沙定洲作亂黔國公沐天波自水竇逃時永命方與必奎餘黨相拒留其將周鼎止防禦城中鼎止勸天波留討賊天波疑爲誘已而殺之走楚雄永命遂率所部歸明年甯州破死之又嚼峨土官王克猷者亦死沙賊之難我朝賜永命通諡曰節愍

那嵩世爲沅江土知府循法敬事永歷帝之入緬也過沅江

嵩與子燾供奉甚謹設饌用金銀器宴畢卽斂以獻曰聊以佐缺乏耳及李定國用敕印招土司嵩授總督銜傳布各土司延長伯朱養恩將軍高應鳳總兵許名臣土司龍贊陽皆既降而復與嵩合吳三桂統

大兵自雲南至石屏州土司龍榮率贅壻黔國公之子沐忠顯赴軍前降嵩固守不下己亥十一月癸亥城陷闔室自焚土民巷戰死那氏藏書甲於滇中灰燼無一存焉我

朝賜通諡曰烈愍

龍吉兆龍吉佐皆麻哈土司也辛丑春吳三桂遣馬寶高啟隆趙良棟攻之吉兆等守七十餘日不下柵破被執三桂問何以兩人曰我受國恩三百年仗義守死何名爲反又問獨

不畏死邪曰我兩人盡忠而死不賢於爾之不忠不孝而生
邪同聲極罵三桂怒截其舌斬之

男承禮編輯

仁和魏錫曾參校
會稽梁繼元覆校

小腆紀傳卷第三十五終

小腆紀傳卷第三十六

前翰林院檢討加詹事府贊善銜六合徐鼐撰

列傳第二十九

李元肩

李建捷王承恩

焦璉

劉起蛟等朱閔如

趙印選

胡一青等

侯性

謝復榮王景熙

曾英

李占春于大海

楊展

袁韜武大定

王祥

傳闕

皮熊

傳闕

王興

李元肩成棟之養子也本姓賈河南人或曰姓孫戊子四月從成棟歸明授錦衣衛指揮使成棟征贛州失利佟養甲密令人齎表北行爲邏者所得上與元肩謀遣祭興陵殺之德

慶道上進元脩吏部尙書通政司疏陳乞官日以千計閣臣
票擬惟著議具奏四字非奉成棟劄咨不得除授文選司擁
空名而已元脩武人性忠實而不知政體袁彭年劉湘客金
堡丁時魁蒙正發之徒輒倚以凌侮朝官當時有假山圖五
虎之號以元脩本姓賈故曰假然元脩爲五虎所愚而不自
知也成棟敗沒元脩益感憤圖報副將楊大甫驕悍不法棄
南雄巡撫羅成耀怯懦棄韶州元脩稱上命誅之軍政稍肅
庚寅正月元旦晉車騎將軍封南陽伯元脩力辭不得乃勉
受車騎將軍印而章疏多不改元銜丁巳

王師克南雄報至舉朝大駭惡元脩五虎者勸上幸梧州太
監夏國祥趣上登舟百官倉皇就道元脩乃奏曰百官皆去

將委空城以待敵邪上自西來今日仍西歸元盾留之恐宵
人謂臣有異志一朝不戒生劫入舟至今思之猶背負芒刺
但廣東一塊土臣父成棟立功於此殞命亦於此皇上若猶
顧念東土臣願留督肇慶與江甯伯杜永和互相堵禦以壯
聲援此元盾之職也上手詔元盾留守督理各營軍務時永
和已棄廣州走海口元盾移書切責永和復入城固守總兵
吳文獻張月李建捷亦屢有斬獲行在少安是年五月元盾
與鄖國公高必正興平侯黨守素先後入朝慈甯王太后垂
簾上東向召三帥入對元盾伏地請死曰金堡等非臣私人
有罪不處分於端州必俟到此地是以臣與堡等爲黨也向
以封疆事急不敢請罪今事稍定請正臣罪上慰勉再三曰

卿大忠大孝朕不疑卿元脩曰皇上既不疑臣何爲以處四
臣之故賜臣敕書令臣安心辦事乎太后遽曰卿莫認堡等
爲好人卿如此忠義他卻謗卿謀反元脩曰謗臣謀反有本
乎面奏乎抑傳言乎上不能答慰諭而已旣廣州桂林相繼
失守疆事大壞上復走南甯叛將陳邦傳劫之中途百官星
散元脩命所部扈駕而身至南海檄舊旅至欽州爲土兵王
勝常所劫械送廣州見孔有德不屈膝令作書招杜永和亦
不從旣聞永和降慟哭三日夜有德怒殺之投屍江中李建
捷亦成棟養子與元脩義兄弟也封安肅伯嘗從杜永和先
登陷陣廣州破走蒼梧與元脩同扈蹕時已登舟出海聞元
脩被執遂歸與同死

王承恩大興人世襲錦衣指揮使永歷時封宣忠伯戊子冬奉命齎敕召弋陽王於建陽山中不至其標下彭鳴京願爲之用田闢有眾數千亦願隨之李成棟聞之忌且怒明年正月丁卯相遇於英德舟中邀之歡飲夜闌佯醉卽席殺之補焦璉字國器山西人精悍絕有力初隸征蠻將軍楊國威麾下崇禎十六年獻賊陷湖廣永明王爲賊所執繫道州獄璉以兵至踰城入獄破械出之王以驚怛致病不能行璉乃背負登城手短兵躍下輕捷如飛賊不敢逼遂疾趨渡河以免卽永歷帝也乙酉八月靖江王亨嘉拒隆武帝登極詔自稱監國國威從逆幽巡撫瞿式耜於桂林總督丁魁楚遣思恩參將陳邦傳討之亨嘉戰敗退入城國威偕璉來援入城守

璉素善式耜且知亨嘉不義夜縋城出與邦傳定計復縋城
入執亨嘉國威等送福州亂遂定丙戌永歷帝立擢參將以
前拯己功優厚之丁亥式耜以大學士留守桂林璉軍隸焉
三月乙卯

王師從平樂長驅入桂林虛無甲兵式耜檄召璉於黃沙鎮
璉率三百人赴之時山水汎溢士卒從水中行百里水及馬
腹至江得漁舟二艇次第渡之以初十日薄暮抵留守府明
日方遣人赴太墟運糧俄數十騎突入文昌門登樓瞰留守
署矢及式耜綸巾急呼璉璉袒背控弦提刀至發數矢應弦
倒璉士卒閉城門

王師之入城者不得出繞城走璉復殺數人乃棄馬越城下

璉麾三百人開門追之

王師自渡江來未有抗衡者見璉出方錯愕而璉引騎直貫其營自寅至午斬首數千級衝

王師爲三已復合而圍之璉大呼入戈刃所及血雨肉飛追奔數十里桂林獲全已而劉承盾部兵之助守城者與璉兵不和鬪而去

王師偵有變猝薄城吏士失色璉出戰自辰至午殺傷無算向晡雨未息收兵明日復出

王師棄甲仗而奔別部將馬之驥亦渡江來援遂大北論功封新興伯旋克復陽朔平樂戊子正月晉爵爲侯二月郝永忠之亂上出奔式耜亦被劫璉聞變自平樂馳援而

王師已乘亂抵北門督師何騰蛟令滇師出文昌門楚師出榕樹門自與璉出北門戰未合璉橫矛直奔我營

王師圍之矢如雨下璉左右衝擊勢如遊龍

王師合而復散者再其部將劉起蛟趙興白貴亦大呼陷陣與璉合擊殺數百人貫營而出

王師大奔大帥幾獲而白貴戰死論者謂桂林三捷南渡以來所未有也已丑八月

王師逼全州起蛟以深入敗績於興安明年二月上幸梧州璉將兵入衛晉封宣國公

王師之再入全州也道遠不能救桂林遂以不守辛卯秋九月陳邦傳以潯州叛璉不知也邦傳誘之入營說之降璉大

罵白刎死我

朝賜通諡曰烈愍

劉起蛟趙興白貴皆焦璉部下驍將也起蛟嘗戰虞山下首級垂馬項纍纍如貫珠焦兵最弱戰輒勝者三人功最多戊子三月之役貴戰死焚其屍獲箭鏃數升興好剛使氣滇將趙印選部眾多劫掠興怒而攻之殺四五人幾大鬪璉不得已斬興以謝滇將己丑八月

王師逼全州璉臥病陽朔起蛟以全營疾趨興安深入重地敗績璉按軍法斬之自三人死而焦營遂弱璉每與瞿共美言之淚輒簌簌下也

朱閔如臨桂人永歷時官左軍都督掛鎮西將軍印辛卯十

二月降將陳邦傳至平樂閔如攖城堅守城陷南望再拜先殺妻子自刎死我

朝賜通諡曰烈愍

趙印選胡一青王永祚三人皆滇將崇禎末滇督命三人將象兵應詔入援乙酉夏甫抵江西而南都已陷假道建昌旋師會益王由本兵起留之共事保甯王通於

王師戰甫合以火箭傷象兵遂大潰亂道遇降將高進庫三人襲其老營殺進庫家屬進庫怒戰益力印選等敗走湖南永歷帝命隸何騰蛟劉承盾之襲騰蛟也印選一青力戰殲其眾騰蛟倚以自強丁亥十月上幸柳州騰蛟率之入衛十一月戊戌大敗

王師於全州還蹕桂林戊子正月論功封印選新甯伯一青
與甯伯二月郝永忠兵亂掠桂林上復出奔騰蛟奉詔以一
青兵入桂林三月丁巳

王師聞永忠之亂乘虛抵北門騰蛟命滇兵出文昌門楚兵
出榕樹門焦璉兵出北門戰方酣一青從東至騰蛟撫其背
曰兒好爲之一青應聲躍馬馳擊諸軍乘之

王師大奔幾獲我帥明年正月騰蛟被執湘潭

王師平楚地印選等相謂曰閩部死軍新破不可復振將死
封疆乎則吾無封疆責將降乎則當日之出滇者謂何瞿留
守仁慈好士可與其當一面蓋往焉收殘卒萬餘人走桂林
式耜大喜遣使郊迎請晉印選一青爲侯永祚爲甯遠伯分

守全州永甯以衛桂林謂之滇營又命永祚會張明剛等圍
永州七月

王師取永甯一青退守榕江式耜檄印選出全州糧匱不克
進十二月永祚敗績於永州軍聲益不振猶晉印選開國公
一青衛國公以慰勞之印選魁然雄桀然驕蹇不奉法與一
青爭大總統大閔一青出守榕江從事頗勞印選則居老營
擁姬妾白娛又與永祚爭聘粵督師于元燧之女爲子婦由
是三人不睦

王師入嚴關莫有鬪志式耜再檄印選則盡室逃永祚迎降
一青與楊國棟蒲纓馬養麟馳出小路勒兵兵自潰乃皆逃
桂林遂陷一青短小便捷馬上騰擲如飛能標鎗取人數十

步外百發百中每乘馬必翦其鬃

王師認爲牛曰此騎牛蠻子不易當也朱治憫嘗作胡將軍
臨陣歌云將軍用槍如擲梭上馬殺賊功最多馬頭一卒驚
鳥過往來拔刃誰敢何果下之馬山頭坡有時奪取紫橐駝
將軍神勇孰同科除是漢代雙伏波我書露布盾筆磨比田
僧超壯士歌蓋一青於三將爲最雄己亥滇都亡竟降

侯性不知何處人永歷時以總兵銜駐劄古泥關丁亥上幸
武岡性往來迎駕自三宮服御至宮人衣被皆辦上喜口授
商邱伯旣劉承盾逆狀日著太后刺血書詔召性入衛性遣
部將謝復榮以五百人至行在八月承盾降於我

大清上與三宮倉卒出奔承盾導

王師追襲復榮戰死上徒步不能前幾瀕於殆性率兵奄至
請上御小轎先發陳兵峽口承盾乃引去上已兩日不食宮
眷狼藉泥淖中饑無人色性供帳甚盛越五日抵古泥晉封
祥符侯

謝復榮不知何處人侯性部下參將也劉承盾劫永歷帝幸
武岡性命復榮以五百人入衛承盾旋降於我

大清復榮與錦衣衛馬吉翔奉上及三宮斬關出承盾導

王師追襲相距才三里復榮請上疾馳而身自斷後力戰與
五百人俱歿又總兵王景熙亦以武岡破戰死我

朝賜景熙通謚節愍

王興漳州人其先以世勛開鎮海疆駐守廣東之文村文村

處萬山中左聯戈壁右挹大洋惟鳥道一線略可通人而灌木叢莽陰翳天日雖健卒短兵不得徑入當永歷帝播遷時帥蠻部累抗

大兵論功晉虎賁將軍爵廣甯伯庚寅兩粵繼陷上入滇興還守文村且耕且屯負固踰十一年我大帥屢購之終不得要領我平南王幕下客金光者奇士也興聞其名使將卒嫚罵曰若陳兵百萬亦奚益金某來則我出矣守陴者以告帥置弗問積日嫚罵如故金聞之浩然請行帥曰蠻語耳烏乎信金請之堅帥欲以兵從曰兵則吾豈敢吾無生還矣乃呼老兵一跨羸馬導至村口守者見之恩恩入有頃令易筍輦進徑數里甲仗模菱積如山興出迓問騎幾何曰一從者幾

何曰一興笑曰子何信之深也金曰公先我信我安得不信
乃升堂燕飲驩若平生酒半興起揮涕曰吾祖宗累世受明
恩約束外藩於茲二百八十餘年矣曩者借兵雪故主讎今
天不祚明矣雖然興豈能爲降將軍者邪語未旣突一人啟
扉出則故侍郎王應華也金與有舊攜手載拜於邑不能聲
飲凡三日旣而興復舉酒曰吾之所以必乞君蒞茲土者將
以明吾不背故主之誠耳子謹厚有膽旣來吾當踐所說命
其五子出拜洗盞更酌撚鬚裂眦大呼曰興不能回天命也
死而有靈藉子以大明虎賁將軍王興之墓作十字碑則幸
矣乃大集所部給資使散歸農自召妻及妾十五人登層棋
手蒸連珠蔽焚死金攜其五子納敕印田土戶籍願降者以

次赴軍前聽用然大半皆浮海去焉我

朝賜通諡曰烈愍

男承禮編輯

仁和魏錫曾參校
會稽梁繼元覆校

小腆紀傳卷三十六終

小腆紀傳卷第三十七

前翰林院檢討加詹事府贊善銜六合徐燕謨

列傳第三十

李定國

白文選

劉文秀

李定國字鴻遠延安人與孫可望艾能奇劉文秀同爲獻賊義子賜張姓獻賊性喜殺亂蜀時立賞格凡部卒日得男壯手二百雙者授把總女倍之童穉不計官以次進階寅出酉還以爲常可望輩遂皆至將軍歲丙戌我

大清兵戮獻賊於西充之鳳凰坡定國時僞稱撫南將軍與可望能奇文秀及僞都督白文選馮雙禮等招集殘寇由重慶南竄明年丁亥春破遵義入貴州可望赴雲南救沙定洲

之亂令定國分兵襲臨安臨安爲沙部李阿楚駐守拒戰甚
力定國穴地置礮崩其城阿楚赴火死城中士民悉被屠遂
圍晉甯及昆陽呈貢歸化晉甯知州冷陽春呈貢知縣夏祖
訓等俱死之江川知縣周柔強率兵拒於撫仙湖戰敗一軍
盡殲迤東諸郡屠戮之慘不亞於蜀也時永歷帝立肇慶詔
令不及至滇可望乃妄自尊還至黔中自稱平東王定國等
亦皆自名爲王寘四王府盡撤昆陽呈貢二城磚石爲之可
望謀竊大號然定國能奇輩猶儕視之定國尤倔强遇事相
抗可望思所以示威與文秀密爲計於己丑春以演武當場
縛定國等其罪杖之百已復相抱哭令取沙定洲自贖定國
心憾之念兄事久未可造次發難輒領所部馳至普洱討定

洲圍以木城絕其水道閱五旬諸蠻懼降者相續乃禽定洲
及其屬數百人以出回至省剝其皮號令通衢黔國公沐天
波來具禮謝雪不共讎凡滇人之攫沙毒者咸稱快焉定國
既并蠻部聲勢益強可望遂無以爲制獨霸之念於是乎沮
會聞粵東有君乃具表奉朔求封爵孫李之隙自此始永歷
帝初封定國爲侯尋進公壬辰春上居安龍我

大清遣定南王孔有德統師南伐有德分重兵駐柳州爲聲
援已以七百騎趨河池州入黔可望請以定國出楚征鹵將
軍馮雙禮副之率步騎八萬出楚連復沅靖殺我總兵楊國
勳進攻湖南我續順公沈永忠棄寶慶退保湘潭定國時駐
兵武岡偵知桂林空虛乃分遣西勝營張勝鐵騎右營郭有

名率精兵由西延大埠頭便道趨嚴關而令雙禮率前軍都督高存恩鐵騎前營王會武安營陳國能天威營高文貴坐營斬統武合兵先進敗

王師於驛湖斬驍將李四進薄全州定國自率右軍都督王之邦金吾營劉之請左協營吳子聖武英營廖魚標騎左營卜甯合兵繼進途接驛湖之報慮全州之眾奔逸并力於桂林也傳令全州傳城者無急攻令未至而全州已下乃令已軍過全州者急過毋入雙禮諸軍亦出城合進時張勝郭有名已至嚴關與定國軍相距十里約曰敵至則舉礮傳警薄暮間礮諸軍欲赴之定國曰無庸俟之寂然蓋有德遣救全州之兵見明兵已營關上旋退去也明日

王師至關下勝傳礮定國令諸軍募食傳麾甫交鋒象憤歸定國斬馭象者諸軍奮勇前進象亦突陣

王師大奔死亡不可勝計天大雷雨橫屍遍野追及於大榕江有德急入桂林定國晝夜環攻七月癸酉克之有德自殺叛將陳邦傳及其子曾禹祖祕希孔承先孫龍孫延世曾盛董英袁道光等被執並伏誅庚辰取永州殺我守將紀國相鄧盾昌姚杰等數十人進復梧州十一月辛巳克衡州我大清命敬謹親王尼堪督師進討遇於衡州城下大戰竟日定國不能支敗走尼堪乘勝逐北遇伏歿於陣定國收兵屯武岡方捷書發自桂林也其人窮日夜易馬而奔既至貴陽直入殿墀下馬臥地不能起灌以湯藥乃甦探懷中出捷書

於是大宴三日可望題請封定國爲西甯郡王兼行軍都招討馮雙禮爲興國侯遣檢討方于宣中書楊惺光齋敕犒軍行有日矣而諸軍之入楚也獨可望之護軍稱駕前軍者不發駕前軍者固選鋒聞桂林之捷生妒心曰北兵本易殺我輩獨不得一當又定國多取金帛上所鹵獲惟孔有德金印金冊人浸數捆官庫財物估價僅盈萬馮雙禮以是不服密啟可望言定國專後恐難制諸往來使命者又多增飾喜怒謂定國間郡王封滋不悅曰封賞出自天子奈何以王封王於是可望益忌之而是時定國軍威壯盛不復可制可望忿甚已聞衡州之敗遣使召赴沅州議事說者曰此僞遊雲夢計耳龔彝亦致書定國曰來必不免定國因止不行率所部

走廣西涕泣謂其下曰不幸少陷軍中備嘗險阻思立尺寸
功匡扶王室垂名不朽今甫得斬名王奏大捷而猜忌四起
且我與撫南弟同起雲南一旦絀誤輒遭廢棄忘我當必尤
甚我妻子俱在雲南豈得已而奔哉諸營聞之有引軍從者
明年可望自將精騎追之猝與

大兵遇於寶慶大敗

大兵亦引還定國遂據守粵西時上在安龍日就窮促而可
望逆謀益亟上乃密與大學士吳貞毓中官張福祿全爲國
等謀遣給事中林青陽齎敕赴定國營進封晉王令統兵入
扈定國奉詔感泣許以身報上復鑄屏翰親臣金印賜之已
而馬吉翔洩其謀自貞毓而下十八人俱被害可望憾定國

益深定國亦恐其來襲出掠廉雷以避之破高州進攻新會
爲

大兵所敗可望聞定國敗駐柳州命馮雙禮襲之定國燒糧
走雙禮謂其快也追之遇伏被擒定國禮而釋之由是雙禮
傾心於定國焉明年定國退駐南甯衰弱不振可望遣總兵
張明志關有才襲之定國計無所出中書金維新曹延生曰
明志等兵雖多皆帥主舊部下安敢相敵今以奇兵襲之彼
不虞我之至也且驚而潰我乘勝至安龍迎皇上入雲南美
名厚實兼收之矣定國然之率靳統武高文貴等集兵萬人
拔寨從小路行五日出明志營後猝衝之明志軍大亂降其
眾三千人進趨安龍可望偵知趣令白文選劫上赴黔文選

竟與定國連和奉上下安南衛西趨雲南滇中守將劉文秀亦怨可望共迎上入城居可望第定國亟令收吉翔吉翔復媚事之以免詳吉翔傳論功封文秀爲蜀王文選鞏昌王文選還黔可望怒其二於定國也奪其眾而譏之然以家口在滇未敢反丁酉夏上命張虎歸其妻子秋七月遂舉兵反九月定國文秀禦之交水白文選暨馬進忠維興等悉叛可望來歸賊狼狽入黔挈妻子奔長沙投我經略洪承疇軍前以降詳可望傳雙禮進忠俱晉爵爲王其餘諸將進秩有差戊戌二月

王師自蜀楚粵三路會兵入黔定國分遣其將劉正國楊武等扼守三陂紅關諸險要馬進忠駐貴州四月王自奇關有

才反定國自將討平之我楚師入鎮遠貴州告急不及救自
奇等誅而貴州遂不守矣蜀師至三陂正國遁遵義亦失五
月蜀師破楊武兵於開州之倒流水秋七月朔上拜定國爲
招討大元帥賜黃鉞粵師抵獨山州十月三路兵俱集戒期
入滇定國與文選雙禮等亦分三路禦之連戰皆敗大營妻
子俱散失諸將北走不相顧馬寶等降報至上奔永昌己亥
正月三日

大兵入雲南上下詔罪己定國還鉞待罪請削秩不許二月
望日

大兵抵大理之玉龍關文選戰敗定國令總兵靳統武以兵
四千扈上奔騰越己乃伏兵磨盤山卽高黎貢山也大理寺

卿盧桂生叛降於我洩其謀復大敗報聞上與馬吉翔李國泰等連夜走緬甸定國收餘眾追扈則上西行去騰越已百里念君臣俱死無益聞文選屯兵木邦就之謀曰主上入緬敕漢兵無入關我若深入恐生不測禍萬一北兵有警此地無險要可禦莫若妥擇邊境屯集作後圖而文選以上左右無重兵請身入捍衛意不合定國遂自引所部從孟艮抵猛緬駐劄前此潰眾陸續至勢稍振未幾移營孟連賀九儀邀文選部將張國用趙得勝等歸之孟艮有女酋長懼爲所并糾眾抗拒定國滅之據其城以敕印招土司謀恢復沅江土司那嵩受總督印密爲傳布各土司亦有聽命者會吳三桂破沅江那嵩自焚死事不果九儀妻子在滇爲三桂所得令

作書招之九儀將出降定國杖殺之國用得勝皆怏怏有
志總兵唐宗堯姦弁也守磨房凡告奮勇投孟艮者已悉收
隸麾下商賈往來者財貨悉被劫由是南北道梗滇中阿瓦
消息絕不通己文選別由木邦舉兵薄阿瓦再舉皆不克乃
還兵至孟艮會定國合兵進逼錫箔江卽垌垌也辛丑夏四
月定國遣使入城求上不許相持久乃退屯三十里緬人於
郊外立木城偪寨拒戰定國文選大破之決計渡河駕浮橋
濟師爲緬所斷復遣都督丁仲柳等於上流造船工將竣緬
出奇兵焚擊仲柳棄船走復不果初定國屢購夷民具奏密
請上速計出坎且言臣等兵不敢深入者激則恐生內變也
必善諭緬人送之出境方爲上策諸臣在內何泄泄不以爲

意也上以璽書獎慰之先後凡三十餘疏半爲緬人所獲不得達尋與文選議分兵進次桐塢以十六舟攻之緬人鑿沈其五遂引還而國用得勝以九儀之死銜定國挾文選北走將出降抵耿馬遇定國部將吳三省三省於安龍之敗尋獲定國家口來詣孟艮至則定國已移營及至磨芳知宗堯姦殺之兵弱不敢深入流連孟定耿馬間文選見三省不言而涕三省察有變說以情質以義諸將心動復合軍屯於錫箔吳三桂偵知之亟令馬寶率兵追文選且招之文選倉猝遂降是冬十二月朔緬人執上及兩宮獻於三桂明年壬寅四月戊午上殂於雲南明亡自戊戌二月以後事互詳本紀及紀年上之舟行入緬也從官雲散馬九功入古刺江國泰入

暹羅二國與緬爲世讎暹羅以女爲定國妃令國泰間道通
殷勤謀連兵攻緬九功亦爲古刺招潰兵三千人致書定國
相犄角方剋期進兵而滇計聞定國蹕踊號哭自擲於地不
食三日表於上帝以祈死於六月十一日生辰病作謂其子
嗣興部將靳統武曰任死荒徼無降也越數日定國卒未幾
統武亦卒嗣興竟以所部降古刺暹羅之師失望而返後有
自緬至者曰定國所葬地至今春草不生蠻人過之輒跪拜
而去云

白文選陝西吳堡人獻賊僞前軍府都督與王尙禮王自奇
爲同儕獻賊死從孫可望潰走川南庚寅秋九月可望自滇
回黔命文選副劉文秀圖蜀克遵義明年文秀還留文選守

嘉定降將吳三桂以

王師入川文選不能抗走黔中壬辰五月復由遵義出重慶將向成都會劉文秀敗於保甯而罷十一月以獬獬兵五萬列象陣攻辰州克之我總兵徐勇參將張鵬遊擊吳光鼎先後陣歿自是威聲頗著然文選雖爲可望用心不直其所爲前巡撫錢邦芑因而說以大義大感動折箭自誓殺可望旣可望聞田州之敗知李定國必至安龍疾召文選將兵迎上入貴州太后聞之哭從官皆哭文選因以情告曰姑遲行且俟西府至西府者定國也遂以輿徒不集報陰留候之數日定國至遂共扈上入雲南封鞏國公奉命回貴陽宣諭可望可望大怒欲興兵與定國決戰文選曰天子在彼戰非策也盍

兩和之可望謂文選畏定國強猶未知其同謀也又以妻孥在滇未敢爲逆乃復遣議和文選白上謂張虎爲可望心腹不可令在輦轂下上命虎送可望妻孥還貴州同謀事始洩文選還自滇可望奪其兵而幽之丁酉秋與諸將謀犯闕馬寶給可望謂使功莫如使過文選才足任也釋之爲大總統既渡盤江率所部奔曲靖單騎見定國文秀於朝曰諸將已有成約宜速出戰遲則不可爲矣定國未之信文選誓之曰誑皇上負國家者身死萬箭下言畢上馬馳定國遂悉師出陣甫交綏而文秀之驍將李本高馬蹶被殺定國文秀色懼欲退文選怒曰張勝已往雲南我退則彼精騎躡吾後不鳥散亦蹂爲肉泥耳死於陣不愈死於走乎況馬維興輩必相

應也率所部直衝維興營維興開營納之合兵繞可望陣後定國文秀繼進大破之可望狼狽降於

王師論功進鞏昌王明年戊戌

王師分三路入滇定國亦分三路拒之命文選出西路率眾四萬守七星關抵生界立營示欲攻遵義者以牽制吳三桂之師聞三桂已出遵義於十一月二十日自生界回七星關守險四山壁立水勢洶湧山上樹木參天名曰天生橋三桂厚養嚮導由苗疆繞渡出天生橋之背扼七星關大路文選偵知棄關走可渡橋而守橋之馬寶亦奔乃焚橋走霑益已而三路兵皆潰上倉猝西行文選走大理列陣下關眾尙萬餘定國以數百騎赴之文選憤涕叱之曰主上以全國全師

昇王一旦至此誰執其咎定國南向叩頭願一死贖前罪文選收涕謝曰王幾許人死敵何益王行矣文選以一身當之耳定國乃引兵追扈

王師至玉龍關文選與張先壁陳勝之師又敗由沙木和走右甸尋走鎮康入木邦時上已入緬定國求之不獲乃就文選謀屯邊隘圖再舉而文選以上左右無重兵恐緬人生心由間道渡隴川潞江踵上所在求之以兵臨阿瓦城不得實耗乃罷時去上所在纔六十里寂無知者庚子秋七月再由木邦舉兵薄阿瓦阿瓦有新舊二城上居舊城之者梗而緬酋自居於新城緬人謀以敕書止之令毋進兵文選不奉詔謂使者曰前者祁將軍來詔云己航閩若前詔爲真則今敕

爲廣使今敕爲眞則航閩後何自而來君非臣何以威眾臣
非君何以使人蠻人不足信也急攻新城垂克矣緬人給之
曰三日後出新城讓王文選信之卻兵十里城中得固備攻
之反爲所敗望鵬鵠城痛哭而去已聞定國取孟艮并有賀
九儀之眾移書責以大義定國遂全師而西中途遇文選購
緬人密奏上璽書慰勞文選造浮橋迎蹕距行在纔六七十
里緬人斷其橋計不行乃刑牲歃盟誓必克緬緬酋拔其豪
邊牙鮮邊牙裸爲大將集兵十五萬遇於錫箔江定國文選
兵不及十一且戎器耗散惟操長刀手槩白梃以鬪定國前
隊稍卻文選警眾橫截之緬兵大敗僵死萬計遂渡錫箔江
旣濟乃謀渡金沙江不克尋與定國分兵進次桐塢以十

六舟攻之緬人鑿沈其五部將張國用趙得勝以賀九儀之死也銜定國謂文選曰王毋爲九儀之續挾文選入山尋挾之北走路過耿馬文選見定國部將吳三省不言而涕出三省察有變因言雲南軍降者皆怨恨不得所人心思明甚於往日張趙復心動與三省合屯於錫箔江會副將馮國恩被獲軍情盡洩三桂選前鋒疾馳三百里至江濱文選毀橋走茶山三桂慮其窺木邦後路乃自與愛星阿結筏渡江而令馬寶分兵追文選及於孟養單騎說之乃降隸漢軍正白旗封承恩公見貳臣傳祁將軍者咸陽侯祁三昇也嘗上表迎蹕緬甸馬吉翔以敕書止之痛哭撤師後以與定國不和走戶臘三桂招之乃降

劉文秀籍貫不可詳獻賊義子爲僞撫南將軍掠川南諸郡
獻賊死稱僞撫南王與孫可望同儕而能下之庚寅九月可
望自滇回黔聞楊展死遣王自奇偕文秀圖蜀忠國公王祥
戰於烏江不勝自刎死文秀降其眾盡收遵義地遣別將盧
名臣取重慶而已引兵渡金沙江攻建昌連陷越巂黎雅王
自奇至川南袁韜武大定拒之聞文秀至撤兵還戰文秀以
大兵壓其前自奇泝流擊其尾大敗就擒遂降旣取嘉定順
流東下而前破遵義時所遣別將盧名臣者入涪州李占春
逆戰於羣豬寺口而敗于大海在忠州聞之知不支遂放舟
出夔門入楚降於

王師諸將盡散無敢應敵者譚宏譚詣譚文亦皆降於文秀

乃留白文選守嘉定劉鎮國守雅州還師雲南壬辰春降將吳三桂以

王師入蜀文選鎮國不能支退入黔中可望復命文秀討虜將軍王復臣副之將步騎六萬出敘州重慶以向成都文秀善撫士卒蜀人間其至所在響應諸郡邑爲三桂所克者次第收復戰於敘州圍之數重三桂走縣州擒我都統白含貞白廣生三桂退守保甯捷聞封南康王初文秀引兵追躡惟恐失敵復臣諫曰三桂勁敵也我軍驕矣以驕軍當勁敵能無失乎不聽至保甯又諫曰毋圍城圍則師分而弱文秀曰三桂坐守孤城計日可下將軍何怯也令張先壁軍其西南先壁驍將也號黑神然勇而輕敵三桂登城見之曰是可襲

而破也出精騎犯其壘畢驚潰轉戰而南復臣營爲亂軍所
擾又阻以水勢不支三桂乘勝奮擊復臣手斬數人曰大丈夫
不能生擒名王豈可爲敵所辱遂自刎文秀撤圍退三桂
不敢追曰生平未嘗見如此惡戰令如復臣言吾軍休矣報
至貴陽可望擬詔曰不聽良謀損大將劉撫南罪當誅念有
復城功罷職間任文秀歸雲南諸軍或分守蜀或調征楚從
者百餘人而已諸軍以廢處文秀太過咸有怨心自是不樂
爲可望用矣會有勸可望招定國者南甯鎮朱養恩言之尤
切可望終忌之乃謀起文秀文秀聞之單騎見可望言已下
劣恐不勝可望強起之疏請爲大招討乙未五月由川南進
攻常德敗績丙申春三月定國奉上由安南衛西走雲南抵

曲靖時文秀守滇亦素怨可望聞定國至陽與都督王尙禮王自竒賀九儀等議守城而私以數騎詣定國曰我輩以秦王爲董卓但恐誅卓後又有曹操耳定國指天自誓遂偕奉王入滇都論功晉爵蜀王明年丁酉秋九月可望舉兵犯關破於交水文秀引兵追之至貴陽收潰卒得三萬人屯守邊隘定國聞而忼之召之還並召諸將之在邊者論功小大爲分兵多寡之地及

王師猝至兵失其將將不得兵迄於大潰文秀在滇鬱鬱不自得每屏人語曰退狼進虎晉王必敗國病革上遺表曰臣精兵三萬人在黎雅建越之間窖金二十萬臣將郝承裔知之臣死之後若有倉猝請駕幸蜀臣妻操盤匱臣子御羈勒

以十三家之兵出營陝洛庶幾轉敗爲功也戊戌夏四月庚寅卒是冬十二月定國敗於炎遮河倉卒議移蹕部將陳建舉文秀遺表請幸蜀議者以爲不可乃止

男承禮編輯

仁和魏錫曾參校
會稽梁繼元覆校

小腆紀傳卷第三十七終

小腆紀傳卷第三十八

前翰林院檢討加詹事府贊善銜六合徐鼐撰

列傳第三十一

朱成功

子經 鄭鴻達

孫克壘

克堧

朱成功南安人鄭姓本名森鄭芝龍娶倭婦所生子也生有異表芝龍引之謁隆武帝見而大悅賜國姓改名成功命典禁旅侍左右輒以駙馬都尉體制尊寵之自是中外稱爲國姓云丙戌春三月封忠孝伯掛招討大將軍印福州破母死於兵號慟不已厥後芝龍議降持裾泣諫不納及北去成功與其客及所部乘巨艦入海收集餘眾數千據南灣居焉是時監國魯王頒厯海上成功以唐魯舊嫌不欲奉之又未聞

粵中卽位詔乃於丁亥十月頒隆武四年戊子大統歷從前
大學士路振飛曾櫻之謀也聞永歷帝立乃歸自南灣泊鼓
浪嶼寇海澄與叔父鴻達合攻泉州敗我守將趙國祚於桃
花山復攻同安漳浦戊子秋遣中書舍人江于燦黃志高奉
表行在封威遠侯己丑春下雲霄薄詔安屯分水關秋七月
上遣使詣島封爲廣平公庚寅五月討碣石鎮總兵蘇利不
克旋師圍潮州我軍乘之復取雲霄詔安部將柯宸樞戰死
盤陀嶺遂解圍軍於潮陽尋乘流至中左所卽廈門從兄彩
聯所據也成功至聯方醉臥萬石巖不得通詰朝相見笑曰
兄能以一軍假我乎聯不及答諸銳突前輓其舟部下皆誓
服莫敢動遂并其軍初彩聞成功至將全軍出避聯阻之而

又不爲備故及金門浯州也與廈門並隸同安爲兩島成功
馳至夜襲之遂雄踞兩島間兵勢日強海寇之在東南者盡
歸心焉是冬

大兵破廣州總督杜永和奔瓊州詔成功入援明年成功率
舟師南下降臣黃澍時受職爲福建巡道垂涎金穴密與撫
臣張學聖謀邀鎮將馬得功乘隙襲廈門傾其家成功還救
得功棄廈遁歸成功誅守將鄭芝莞三軍股栗乃稱索償并
力轉攻沿海屬邑皆下之主辰春魯定西侯張名振大學士
沈宸荃兵部侍郎張煌言奉魯監國航海入廈門成功禮待
頗恭三月進圍漳州凡七閱月城中糧盡人相食死者枕藉
有士人飢死鄰舍兒竊食之剖其腹歷歷皆故紙字蹟可數

鄰舍兒亦一慟絕秋九月與援師戰於九龍莊敗績解圍退保海澄

王師乘勝進攻城壞百餘丈成功親冒矢石悉力堵禦一日聞空礮遞發令曰是將臨城矣勒兵挺巨斧視敵之緣城者斫之

王師渡壕大呼登城城上眾斧齊舉隨斫隨落濠爲之平城獲全癸巳有構魯監國於成功者禮待少懈監國乃徙居金門自去其號甲午我

朝下令招安芝豹等皆就撫成功不順命乘機登岸措餉大擾福州興化等郡冬再遣使招之成功迄不應乙未寇仙遊破舟山暨惠安同安南安等邑丙申進略溫台還攻甯德殺

我守將阿克襄戊戌永歷帝命周金湯航海至進封成功爲
延平郡王時聞

王師入滇遂議大舉入寇從行甲士凡十七萬以五萬習水
戰五萬習騎射五萬習步擊以萬人爲往來策應以萬人爲
鐵人鐵人者披鐵甲繪朱碧彪文聳立陣前斫馬足最堅銳
以侍郎張煌言爲監軍抵浙境陷樂清甯海等邑比次羊山
颶風怒發碎巨艦百餘漂沒士卒八千餘人義陽王者亦溺
死成功廢然返明年己亥五月復出崇明入江抵京口奪瓜
洲圍鎮江

大軍分五路疊壘而陣成功令周應傳礮金鼓震作與江聲
相沸騰士卒皆下馬殊死戰郡中懼走降相繼屬邑皆下部

將甘輝進曰斷瓜洲則山東之師可扼據北固則兩浙之路不通但須坐鎮於此南都可不勞而定也弗納竟薄金陵至觀音門已而登陸屯岳廟山輕敵不備縱酒爲歡煌言與輝並苦諫以嚴城師老猝不得拔必生中變復不納久之

大軍由儀鳳門穴城出銜枚疾走直搗中堅別以騎兵數萬繞出山後夾攻之遂大潰甘輝以數騎奔江口被執死之成功急麾兵退入於海攻崇明不下棄而歸冬十月還烏痛哭甘輝而後入曰試從其言吾不及此夫立廟旌其忠庚子夏王師進討以廣東降將爲導大小數陣殺傷相當泊戰海上成功手自擎旗風吼濤湧軍士踏浪如飛我軍不諳海性暈眩不能軍遂大敗將軍達素者自殺初芝龍與羣盜出沒臺

灣就撫後爲紅夷所據成功自江南敗歸勢漸蹙亟思拓地
適紅夷甲螺何斌懼罪來降陳臺灣可取狀乃於辛丑三月
百艘泊澎湖次鹿耳門湖水驟漲高丈餘揚帆直達夷人驚
怖莫措遂克赤嵌城進逼王城城爲荷蘭所居久不下冬十
月我

朝棄芝龍於柴市鄭氏子孫之在京者無少長皆伏法十二
月成功悉力攻荷蘭城曰斯爲先人故土所志在城餘以歸
汝荷蘭乃出降成功旣克臺灣制法律定職官興學校修武
備大起池館延納名流以赤嵌城爲東都曰承天府縣曰天
興萬年康熙元年壬寅五月卒年三十有九長子經嗣立經
卒長子克塽嗣爲其下所殺次子克塽嗣康熙二十二年癸

亥秋七月

王師克臺灣克塽降自成功起海上迄克塽凡三十八年皆稱永厯年號事繁不具錄詳見延平春秋及紀年

鄭鴻逵芝龍弟崇禎庚午武舉人爲天津巡撫鄭宗周部將以芝龍平紅夷功蔭錦衣衛千戶尋中庚辰武進士故事勲衛射策甲科加三級進都指揮使癸未授副總兵宏光帝卽位檄守采石掛鎮海將軍印尋與從子彩監軍楊文驄守鎮江乙酉四月以擊高傑亂兵功封靖虜伯

王師渡江不能禦由海道入浙遇隆武帝於杭州大奇之令副將江美鼐鄭升衛之入仙霞關偕芝龍奉以監國鴻逵欲早正大位以繫人心諸大臣以爲不可鴻逵曰不正位無以

厭人心而杜後起議遂定論翊戴功與芝龍并進爵爲侯賜
號奉天翊運中興宣力定難守正功臣上行郊天禮二鄭稱
疾不陪祀鴻達又揮扇殿上爲尙書何楷所劾由是文武不
和芝龍以不出師無以厭眾望乃請以鴻達出浙東彩出江
西冬十月上親征以鴻達爲御營左先鋒彩爲右先鋒登壇
行推轂禮當授鉞時風雨晦冥鴻達出城馬蹶踣地識者以
爲不祥鴻達出關候餉未卽行明年六月浙東潰鴻達棄關
徒跣奔

王師遂抵仙霞事聞行在大震削其封爵未幾以元子誕生
復爵晉漳國公尋改定國公芝龍之北降也鴻達諫不聽請
備之亦不聽乃以其眾入金門冬

主師乘間入安平朱成功自金門逐我師而守之鴻達謂安平彈丸無險可恃勸成功取泉州會師桃花山攻泉州不克辛卯二月我鎮將馬得功以成功出師廣東乘虛襲廈門成功還救得功扼險不能退舊嘗爲鴻達標下守備故相識也計窮乃冒死駕小船見鴻達說之曰得功奉令過島今無舟可渡必死但恐得功死此島人民萬不能全耳公兄在京眷口在安平乞熟思之鴻達乃逸之去成功以爲大恨旣誅守將鄭芝莞飭鎮將不許赴鴻達衙署而鴻達見成功能行其法殊不爲怒將所部付之謝權歸隱築寨白沙溝亭沼藝花木笙歌自娛後爲我將王進功所攻成功移之居金門丁酉三月遘疾卒

男承禮編輯

仁和魏錫曾參校
會稽梁繼元覆校

小腆紀傳卷第三十八終